

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA, PENGGAL KEDUA**  
**PARLIMEN KEEMPAT BELAS**

**PERTANYAAN : LISAN**

**DARIPADA : DATO' SYED ABU HUSSIN BIN HAFIZ SYED  
ABDUL FASAL [ BUKIT GANTANG ]**

**TARIKH : 1 JULAI 2019 (ISNIN)**

**SOALAN :**

**Dato' Syed Abu Hussin bin Hafiz Syed Abdul Fasal [ Bukit Gantang ]** minta **MENTERI INDUSTRI UTAMA** menyatakan apakah langkah-langkah drastik yang diambil oleh Kerajaan dalam usaha mengukuhkan kembali harga jualan kelapa sawit bagi suku tahun kedua 2019. Ini memandangkan masyarakat luar bandar terutamanya di Parlimen Bukit Gantang, Tanah Rancangan FELDA dan pengusaha tanaman kelapa sawit cukup terkesan dengan keadaan sebegini.

**JAWAPAN**

Tuan Yang Di-Pertua,

Izinkan saya menjawab soalan ini **bersekali** dengan soalan yang telah dibangkitkan oleh **Yang Berhormat Jasin pada 4 Julai 2019** dan **Yang Berhormat Beaufort pada 10 Julai 2019** yang juga menyentuh tentang isu yang sama.

Tuan Yang Di-Pertua,

Kementerian menyedari bahawa harga pada ketika ini bukan saja terkesan kepada pekebun kecil sawit di Parlimen Bukit Gantang dan Tanah Rancangan FELDA sahaja malahan ianya terkesan kepada seluruh pekebun kecil sawit di negara ini.

Kerajaan sedang berusaha mengambil beberapa langkah drastik untuk membantu menstabilkan harga minyak sawit mentah tersebut. Antara usaha yang telah mula menampakkan hasil adalah dengan langkah peningkatan adunan biobahan api sawit dengan diesel petroleum Program Biodiesel B10 (adunan 10% biodiesel sawit dan 90% diesel petroleum) yang telah dilaksanakan secara mandatori pada 1 Februari 2019 yang lalu bagi sektor pengangkutan. Implementasi program ini telah benar-benar membantu meningkatkan penggunaan minyak sawit domestik dalam negara dengan anggaran peningkatan jumlah sebanyak 767,000 tan. Perlaksanaan program B7 bagi sektor industri pula akan bermula pada 1 Julai 2019. Ini akan meneruskan lagi impak positif tersebut terhadap industri sawit negara.

Selain itu, Kerajaan akan terus menjalankan misi-misi ekonomi dan lawatan teknikal bagi mengukuhkan hubungan dengan negara-negara pengimpor utama produk-produk sawit Malaysia. Kerajaan berkeyakinan melalui pendekatan hubungan mesra dan akrab dengan negara-negara luar, ianya akan memudahkan produk-produk sawit mendapat akses pasaran yang lebih meluas di negara-negara tersebut.

Untuk makluman Ahli Yang Berhormat, Malaysia pada tahun ini juga sedang mengetuai satu gabungan kerjasama bersama Indonesia menerusi Majlis Negara-Negara Pengeluar Minyak Sawit (*Council of Palm Oil Producing Countries* atau CPOPC). Kerjasama ini adalah untuk memantapkan lagi amalan persekitaran mampan, pengurusan bekalan, aktiviti promosi dan pembangunan pekebun-pekebun kecil. Dalam hal ini, Kerajaan telah merangka beberapa strategi bersama dengan Indonesia untuk mencari kaedah-kaedah yang bersesuaian untuk isu-isu semasa mengenai industri sawit.

Dalam masa yang sama, Kementerian juga akan meneruskan strategi-strategi jangka masa panjang bagi mengukuhkan harga sawit yang merangkumi tindakan-tindakan berikut:

- i. memperkuatkan pasaran eksport utama sedia ada terutamanya negara China, India, Pakistan, dan Amerika Syarikat serta mempromosi produk-produk sawit dengan lebih

agresif bagi menembusi pasaran-pasaran baharu seperti di benua Afrika ;

- ii. meningkatkan aktiviti penyelidikan dan pembangunan (R&D) dalam penghasilan produk-produk baharu serta memberi nilai tambah kepada produk hiliran komoditi;
- iii. meningkatkan akses pasaran yang lebih baik melalui perundingan perjanjian perdagangan bebas (FTA) dua hala dan perundingan pelbagai hala atau serantau.

Namun demikian, harga minyak sawit mentah (CPO) bergantung kepada pertumbuhan ekonomi, permintaan dan penawaran serta jumlah stok minyak sawit oleh negara-negara pengeluar terutamanya Indonesia yang merupakan pengeluar terbesar minyak sawit dunia.

Kejatuhan harga CPO di Malaysia adalah disebabkan oleh lebihan bekalan CPO di pasaran tempatan. Paras stok CPO pada April 2019 berjumlah 2.73 juta tan berbanding 2.19 juta tan pada April 2018. Faktor lain yang juga menyumbang kepada penurunan harga CPO adalah kejatuhan harga minyak kacang soya (SBO) di pasaran antarabangsa. Ini kerana minyak kacang soya merupakan barang pengganti kepada minyak sawit. Selain itu, pergerakan nilai matawang Ringgit Malaysia berbanding Dolar Amerika turut menyumbang kepada turun naik harga CPO di pasaran tempatan.

Dalam hal ini, Kerajaan menjangkakan impak positif terhadap harga minyak sawit melalui usaha dan strategi yang telah dinyatakan.

Sekian, terima kasih.